

Repertorio di manifestacion cultural a genera hopi comentario

ORANJESTAD - En general, mayoria ta opina cu e manifestacion cultural di diamars anochi riba Plaza Libertador Betico Croes tabata agradabel y bunita. Sinembargo tabatin un ke otro cos cu por a wordo premira y evita pa asina haci di e evento un exito total. Consenso ta cu organisadornan mester a revisa cada un di e shownan pa presenta cu e fin di evalua nan contenido pa wak si esaki ta adecuado of no pa e pareha real y su comitiva presencia.

Ta un cantidad di regla y norma cu mester tene na cuenta ya cu ta trata di un miembro di famia di real. Pesey mes no ta

compronde con cierto cosnan a wordo permiti pa presenta e anochi ey asina numa.

Un presentacion en particular ta esun cu a hala mas atencion di pueblo di Aruba y mas cu hala atencion, a laga un smak no mucho placentero atras. Ta trata di declamacion di autora Philomena Wong, kendenos tin sigur, tinsu talento, pero ta e scogencia di material ta loke ta cuestiona.

Por a compronde cu ta e mesun circulo artistico a recomenda e persona aki y nan lo tin nan motibo balido. Sinembargo hopi ta pensa cu lo tabatin yen di otro tema of poema pa declama cu esun ey

di 'placa.'

E reaccion die pareha real tabata visibel durante y despues di e presentacion di Wong. Durante su declamacion, e rostro di Prins Willem y Prinses Maxima tabata un di desconcierto pa e contenido y expresion



trece dilanti. Na final, S.A.R. Prins Willem Alexander a haci un comentario tanto na su esposa como na otronan rond di dje cu claramente tabata demostra un caracter negativo. Esaki tur hende por a mira riba e transmision di TeleAruba.

Otro comentarionan tabata relaciona cu contenido di cancionnan, si esaki tabata of no e mihor seleccion pa presenta na Prins y su señora. Tambe e maestronan di ceremonia y loke a dunanan pa papia of loke a ser bisa ora mester a improvisa,

tabata un punto di combersacion durante dia di ayera.

Atrobe Bon Dia Aruba ta kere cu lo tabata na su lugar pa e comision organisador di e bishita oficial, en especial e grupo of persona encarga cu e manifestacion cultural, wak detayadamente e contenido di cada presentacion y artista pa asina segura su mes cu esaki lo cai, primordialmente na e invitadonan di honor, pero tambe na e publico y pueblo ya cu tur cos ta wordo haci y presenta na number di henter Aruba.